

范伯子先生全集

范伯子先生全集

范伯子詩集卷第十三

通州范當世无錯

光緒二十五年己亥遲粵脩不至遂留上海度歲至二十六年庚子三月還家作

果然

一紙相看事果然朝娛旰哭到窮年遊絲忽落三千丈錦瑟眞成五十絃老寡可憐垂涕晚大僚應記受恩偏愚生只把春王筆載白堯天入舜天

書賈人語

去卽去耳誰爲賢人如綠草生春田鐮刀割盡還須長不聞但有今歲無來年東家獨患囊無錢傭保雜作何有焉請看朝廷

言一三
沒曾左也有後相來聯翩我聞此語悅失色從此昆侖泰華皆
不堅明朝便叱玉皇退何能一帝專諸天

題陳鷗民月湖琵琶圖兼答其釣臺徵詩啟

郎官湖是青蓮造商婦絃爲白傅留漢水漁人真好事一圖兼
攬兩千秋

聞君別有徵詩具日傍琴臺望釣臺笑煞嚴光亦淪落不然寧
用客星來

臘月二十七日漫書

雪後從容復陰雨詩成嬾散更歌行不知門外今何日便與樓
頭送此生老賈失時尋舊話童奴少事問書名無心撥盡一爐
火不寐聽殘五轉更兩境可能天不隔萬年難使物多情閉門

習靜干風事卻撼虛窗故故鳴

余題月湖琵琶圖因及釣臺集而有嚴光淪落之歎又引
申之而得歌詩十句

我笑嚴光釣澤濱亦是天涯淪落人所以乘機一謁帝寫此鬱
勃方藏身豈知帝星亙天上也有生命不及辰忽忽未知生可
樂慙慙常與死爲鄰等閑多少窮途淚可以飄飛化作塵

謝敬如念吾母

萬重冰雪裏誰者暖人心昔語多君智今來不我尋門闌天地
隔車轍海河深不敢望吾母勞君代叱吟

有母論饑飽孤兒罪更多文深徒繾綣勢在竟嵯峨孰使求高
者能如苟賤何勤勤將子意同淚與滄波

柬愛滄

昨者應從白門至聞吾未歸弗駭耶人間失路安有限疑此未
算窮無加有母能慈有子好祇以不見爲嗟呀詩骨強於隼飛
雪歸心急似蟹爬沙門前一江化銀漢雲路盡絕天無槎只可
相從復消夜與君揮淚說京華

和善夫

怪底沿江水奔注四海平添淚人兩聖手無柯亦莫望佞頭擬
劍教誰鑄日光雲爛方賡歌誰解唐虞事若何尼山亦是阿諛
者佛祖焉能免罵訶

除夕詩狂自遣

歲歲年年有更換不見留光可稍玩惟獨今年除未除雄詩百

首長爲伴人言詩必窮而工知窮工詩詩工窮我窮遂無地可入我詩遂有天能通

我與子瞻爲曠蕩子瞻比我多一放我學山谷作遒健山谷比我多一鍊惟有參之放鍊閒獨樹一幟非羞顏徑須直接元遺山不得下與吳王班

除夕無聊復次山谷還家呈伯氏詩以貽余仲

平生浪把千乘輕臨老方知一簞豆覲面獨有同饑人意態荒寒節物醜便將蟻力銜山來一歡已落啼號後況有衰顏七十親旦晚念吾應更瘦汝弗浪愁虛費醫吾實慮汝一腳手聞吾不歸誰最驚蓬巷悽悽二三友亦有孤寡汝弗知告訴無門應罵詬吾非不從僕人言早計從容棄此走門庭羅掘會將窮鄰

家稱貸亦何有明年誓將爲人役不俟饑來始張口摛文未至
茅塞心作字無虞柳生肘誰能與人作筐篋猶得逍遙辭鎖鈕
汝曹愛兄莫漫悲與汝安心一盃酒十年肝腎吾能勞二分齒
髮先吾朽何況於今萬乘如飄風齊楚化爲无是公長饑餒
到吳儂微命區區愁不從百變終能娛樂已世間獨有馮公耳
與劉一山除夜深談贈之一詩并將以示彥升兄

不以俗子相繞纏不與家族同熬煎祇以青燈照白話與子相
對成一年子之識力萬夫賢覺旦有在鳴雞先公卿攬子欲爲
臂嗟子十口何能捐平生小心結師友負累何止千萬錢到今
簿記百不省更用三省常自鐫人間來日是何世愁霖汜濫高
無天園傭折花不能賣蘭薰雪白何爲焉不然有若蕙修者壯

老一概窮當堅瞬獨胡緣竟欲死隔海與我愁悒悒

一山以彥升來書相

示有生不如死之爲樂云云蕙修亦彥升字也

元旦疊韻自占

怪怪奇奇盡偶然昏庸柄國已千年欲傾東海斟臣酒怕有西風拂帝絃近死不知機發驟同憂奚俟夢來偏逃塵便與追前迹河上今無二畝天

連陰十餘日夜忽無風而自霽雖僕輩猶知明日之復雨也

一雨十日不放晴紅日不出天無晴祈求想望已心死兀坐樓上甘沈冥然燈燒燭照宵詠良久不聞檐溜聲童奴開門問雪否還走笑言天不誠無端收空散雲霧直視萬里星光明吾聞

沈陰若災禍每至康復須威刑炎日斬斬施雷霆寒月刮地風
崢嶸不風不霆只無事何處頓成開霽形恐是陰類自怡悅拂
拭后土便宵行請看凌晨日欲上果然復雨如盆傾

以保生釐東薦之伯謙

李白韓愈浪得名子瞻山谷皆平平不然嶽崎歷落如我者焉
得置之世上鴻毛輕雖然時遷勢亦異依然同類相枯榮籍湜
駸駸入文府秦晁往往句同賡貧窮陸離亦有會龍饑虎困風
雲生可憐達者竟誰是祇有裴子食一城天哀其親俾得養亦
俾其友從呼庚原嘗死矣平津絕羣士從容餓芋成何用千金
買駿骨真能一飯揚名聲吾鄉如今有瑰寶曩列高價子所評
種松十年冒霜雪凍骨漸與寒山撐吾雖半菽不獨飽忍能對

作空腸鳴會將質裘持送似令就吾子天南征齋吾詩騷與將
去還乞吾子持與諸家衡

保生伯謙尊人試
通州所得士也

正月四日雨稍止一山拉入市買報閱之因晤諸子同飲

次善夫元日二首韻

乘春百物動公等意如何苦雨如相偪炎曦不再過妖姬猶傳

粉羣貴尙鳴珂徧奏迎神曲今宵樂事多

是夕迎財神
徧地喧鬧

那得深山裏冥冥萬古天便將巢作姓不問舜何年忍死吟吾
句含悲入此筵茫然真一概莫道汝爲賢

敬如題漢陰課漁圖真妙作積欲和之而未有辭會其爲

我營歸計將成喜而徑書十二句并以結來滬同居之

約

我歌獨有陳生尋爲絲爲桐成一琴升堂入室鑱鈕斷知心取
意江河深正憶康衢結交眾寸步艱難不汝送各以悲歡閱歲
年傳盃天地眞如夢一波送我還江津媿之活水魚鱗鱗范張
已分能生死元白將來合作鄰

善夫以次韻少陵杜鵑行索和余患詞意之將竭也用其
韻爲三足烏行

君不見龍孫飛上天化爲日中三足烏人間烏生八九子惟有
神物難將雛蟾蜍東西但相望緘默不語甘羈孤人間烏鴉積
此恨晨夕出入悲啼呼汝羿已射九日落那不釋此常區區縱
滅其形難滅影到今反笑奸雄愚貫通三才作王字看渠能抹
青天無看渠能抹青天無不用快快持戈趨

與義門論詩文久之書二絕句

六籍英靈葬死灰憑虛喚得幾聲同絃歌已落伶人手豈憶尼山學道來

最有空詞定樂哀網羅故實定非才請看鐙雨檐花句便值高

歌餓死來

二詩蓋不佞之常譚以爲工部當時若作檐前細雨鐙花落便不成語言更值不得高歌餓死也聲音之道亦莫知其所以然高才若從此悟入豈尚有死法可循哉

人曰和杜公追酬高蜀州詩用其體韻

人間何日不興作何代無人怨淪落把手杜公人曰篇感激淒傷淚如昨遙遙大歷千年來人代相看已寥廓寧我獨無經世才知君亦乏匡時略常將短札記經過更把長篇娛寂寞言懷稷契悲唐虞坐想驊騮憶鵬鸚如今似我更無論漢中昭州無

一存劉表能談周禮樂趙佗不問漢乾坤朔風慄慄重陰覆西
海滔滔萬溜奔天意寧嗟腐敗土舊遊欲斷公侯門可憐世季
生無賴要使饑驅道不尊尺水漣漪復何有涸餘常此役驚魂

臨睡感題杜集

了知身世風馳過無奈當前日似年事至終須一笑遣吟成翻
藉百憂煎思君往矣真同物問我誰歟待後賢病體不勝爐火
澹仍能辛苦課宵眠

鎮日無聊疊韻寫意

爐中活火看全世簾裏飛烟幻百年硯墨滂然隨筆盡壺冰清
絕爲茶煎繁聲雜沓酬佳節小說淋漓有大賢昔日經過裘馬
客不知誰向酒家眠

寫詩與女壻陳師曾三疊前韻跋尾

不信人間許大事徐徐放下又經年雲天斷影紛難繪燈火殘
膏尙自煎未覺馬揚真可樂焉知牛李孰爲賢詩書麴蘖將安
用醞釀老夫成醉眠

有所聞並憤所見四疊前韻

似聞雲錦翻新樣并說珠襦類往年前席終無一籌展對觴誰
免百憂煎賜哺恩澤雖云濫博塞歡娛豈謂賢疑是諸公啖榆
飽不然何至抱新眠

入此年忽忽又經旬矣時日之流驚心動魄五疊前韻示

兒曹

要知元日須珍重涉夜侵晨是一年萬種去來皆恍惚百般苦

樂與熬煎陸沈酣
參原知誤瘠死清貧未必賢
不有千春呼吸在何分
一醉短長眠

次韻杜公偁仄行贈善夫

偁仄復偁仄我居滬南子滬北向者皆從何處來對人乃爾無
顏色自從開歲盛衣冠愈覺長途有荆棘天陰雨溼宜爲辭晴
好依然行不得一車縱難賃兩腳豈無力頻來看竹主應罵仍
與借花賓不識江頭士女如狂顛香車寶馬紛馳傳鳬飛鴈集
莫比數遙望直入冥濛天陳生吾黨類見面猶悲憐彼亦皇皇
自求活那能日夕相歡然忽憶與君是同歲瞬息便到知非年
此間寧著爾許物撫己但合深山眠好把出門賃車費竟作還
家買權錢

感於東坡生日之作遂爲摯甫先生六十壽詩

人生百年一刹那賢愚貴賤同一科挈長量短其如何祝禱稱
頌皆私阿要使日月無空過聖哲自比庸愚多有儒一生高嗟
峨墮地便與書相磨浸濯滋潤成江河放之一州勤民痾晝執
吏事晨自哦卽飯仍與賓搓摩判簡披牘如交梭不肯俯首慙
羲娥猶嫌一官遭網羅於世無補身受瘥立起自効投烟蘿從
此壹意知靡佗嗟彼豈誠書有魔方今儒術資撫呵腐士不識
眞邱軻死守徒以來倒戈後有萬年寧可訛濯而出之渾渾波
莫置高阜平不頗用此憂勞鬢亦皤獨與往聖留純和我年十
九付蹉跎矧今傷心至蓼莪忍死惜淚吟庭柯感念身世終滄
沱會以生日觴東坡類引更爲先生歌